

**Tuesday, March 3, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**REGIONAL NEWS BULLETIN**

**(MIDDAY)**



## **NCC**

Larsap General (Retd) Vijay Kumar Singh an vawiin khan Mizoram atanga National Level Camp-a tel National Cadet Corps cadet 19 te lawmpuina hun Durbar Hall, Lok Bhavan-ah a buatsaih. He hun hi Chief Minister Pu Lalduhoma, Sports & Youth Services Minister Pu Lalnghinglova Hmar leh Lt Col Clement Lalhmingthanga, MLA te'n an telpui a ni.

Larsap chuan Mizoram NCC indin thar zelna kawngah hmasawwna thar a hmu chu phurawm a tih thu a sawi a. NCC Group HQ Aizawl hawn thar a ni leh hemi hnuai Mizoram NCC Unit zawng zawngte tha taka kalpui a ni chu lawmawm a tih thu sawiin, hemi avang hian thalai tam zawkin NCC an zawm belh ngei a beisei thu a sawi a. India ram NCC cadet sang chuang zingah fiahna hautak tak paltlanga national level camp-a tel thei cadet 19 lai Mizoramin a nei chu chhuanawm tiin, hei hian cadet-te taimakna, inthunun theihna leh tumruhna nasat zia a lantir a, fak pawh an phu hle a ni, a ti bawk.

He hunah hian Larsap leh Chief Minister-te hian National Level Camp-a tel NCC Cadet-te hnenah chawimawina thilpek an hlan bakah an tawnhriatte zawtin an kawm bawk.

He hunah hian NCC Mizoram Group Commander, Brig GS Arora, NCC Officer-te leh Cadet tawiaawmtu an chhungte an tel a ni.



## **FCI**

Tukin khan Sairang rel station ah FCI buhfai lo phurh thlen a ni a, Rel Wagon 42 lo thlengin FCI Aizawl divison in Mizorama lian ber tur Godown a sakah dah a ni ang.

Buhfai phurhna hlat thin avanga District hrang hrang godown a buhfai supply muang thin chu a tih ziaawm ngei an ring tih FCI Mizoram Consultative Chairman Pu K.Vanlalvena MP chuan a sawi a, tuna buhfai lo thleng hi quintal 25900 a ni a, Punjab atanga lo kal a ni a ti.

Buhfai lo thleng te hi MP Pu Vanlalvena leh Food Civil Supplies & Consumer Affairs Minister Pu B.Lalchhanzova ten FCI, Divisional Office in buatsaihin an lo hmuak thleng a, Supply Minister Pu B.Lalchhanzova chuan Rel hmanga Sairang Rel Station a buhfai phurh thlena a lo awm ta hi Mizoram mipui tan thil chhinchhiah tlak tak nia a hriatthu a sawi a, furpui lo thleng turah pawh a thlamuan sawt thu a tarlang.

Minister chuan tunah chuan Aizawl,Lunglei leh Lawngtlai FCI Godown-a dah tur chu Sairang Rel Station-ah hian a lo thleng tawh dawn a. Bairabi Rel

station-ah chuan Mizoram hmar lam Godown-a dah tur a thleng ve tawh thung dawn a ni, a ti.

Supply Minister chuan Sairang Rel station-a buhfai lo thleng tur chungchangah hian Sairang Dinthar Khawtlang hruaitute leh YMA te biain, Buhfai hi Pathianni-ah te, zing leh zanah te pawh a lo thlen hun a awm dawn a. Rel station atanga, Sairang Dinthar-a FCI Godown-a motor lianin a thiar a ngai dawn a. Chuvangin Sairang khawtlang nun pawh a tibuaina chin a awm dawn a ti a. Hemi kawngah hian Sairang mipuite dawhtheihna leh hriatthiamna a ngen tih a sawi.



## **SIC SWORN IN**

State Information Commissioner atan IAS officer pension Dr Lalzirmawia Chhangte chu vawiin khan Larsap Gen Retd VK Singh-an rinawmna thutiamtirin a la lut.

(BYTE)

Laklulh inkhawm hi Lok Bhawan ah neih niin Chief Minister Pu Lalduhoma, Speaker Pu Lalbiakzama leh official dang te an tel a ni.

Dr Lalzirmawia Chhangte hian State Information Commissioner post 2 zinga pakhat a luah anga, IIS officer pension Pu Mangjangam Touthang nen State Information Commissioner an ni dun dawn a ni.



## **DP&AR MINISTER**

Department of Personnel & Administrative Reforms Minister Pu K.Sapdanga'n sorkar hnathawk aikal lak avanga chawltir mi 29 zingah Tourism Department atangan tam berin mi 18 chawltir an nih thu House a hrilh.

Vawiin Assembly thutkhawma zawhna leh chhanna hunah he thu hi sawiin, DP&AR Minister chuan sorkar in aikal lak tihtawp a nih theih nan nasa takin hma a la a, aikal la te chu a tul anga hrem zel an ni a ti a, sorkar hnathawk aikal lak avang hian mi 37 te chungah hmalak a nih tawh thu sawiin, mi 29 chawltir an ni a, midang 8 te hremna tenau leh zilhauna pek an nih thu a sawi. Tourism Department atangan chawltir mi 18, Power & Electricity department atangan chawltir mi 7, School Education Department atangan chawltir mi 2, General Administration Department leh Health & Family Welfare Department atangan chawltir mi 1 ve ve te bakah Higher and Technical Education Department atangan hremna tenau leh zilh hauna pek mi 8 an awm thu House a hrilh.

Tourism Department atanga chawltir mi 18 te hi Asst. Receptionist (P.E) pahnih leh IV Grade (P.E) sawmparuk, P&E department atanga chawltir mi 7 te chu Electrical worker paruk leh Group D pakhat an ni a, School Education Department atanga chawltir mi 2 te chu MR Teacher ve ve an ni a, Health Department leh GAD atanga chawltir te chu Group D(PE) pakhat ve ve an ni a, Higher & Technical Education Department atanga hremna tenau leh zilh hauna pek mi 8 te chu Govt Kolasib College-a thawk Assistant Professor te an ni.

DP&AR Minister chuan sorkar hna tam zawk chu confidential-a vawn chi a nih avangin sorkar hnathawkte chauh thawh tur a ni a, aikal te chu sorkar hnathawk an nih loh avangin aikal lak chuan India danpui a bawhchhia a ti a, hei bakah hian aikal lak chuan zik tluak taka sorkar hna zawngte hmakhua a dip dal avangin natural law a bawhchhia bawk a ti a. Sorkar chuan tun thlengin aikal lak dan siam tumna a la nei lova, aikal mamawh, hnathawk tha thei tawhlo te tan 'Mizoram Special Voluntary Retirement Scheme 2024' siam a nih thu House a hrilh a ni.

